



RUDAR

BROJ 100

*SRETNNO
u novoj 2024. godini*

POVODOM 21. DECEMBRA, ĐANA RUDARA BiH

ODRŽANA SVEČANA SJEDNICA UPRAVE I NADZORNOG ODBORA RMU „BANOVIĆI“ d.d. BANOVIĆI

POVRŠINSKA EKSPLOATACIJA UGLJA

POVEĆAN NIVO RASPOLOŽIVOSTI OPREME

POTPISAN NOVI KOLEKTIVNI UGOVOR U OBLASTI RUDARSTVA

PRIMJETAN RAST MATERIJALNIH PRAVA RADNIKA





ODRŽANA SVEČANA SJEDNICA UPRAVE I NADZORNOG ODBORA RMU „BANOVIĆI“ d.d. BANOVIĆI

RASIM DOSTOVIĆ: PONOVO ĆEMO STABILIZOVATI RUDNIK I NAPRAVITI USPIJEŠNU KOMPANIJU

Povodom najznačajnijeg rudarskog praznika, Dana rudara BiH u prostorijama Pozorišne sale Radničkog doma održana je Svečana sjednica Uprave i Nadzornog odbora RMU „Banovići“ d.d. Banovići.

Prije zvaničnog početka sjednice organizatori i zvaniice upriličili su polaganje cvijeća i učenje Fatihe ispred Centralnog spomen obilježja, te se na taj način prisjetili i odali počast poginulim borcima.

Svečanom skupu su, pored organizatora, prisustvovali i predstavnici svih nivoa vlasti, brojni poslovni saradnici, kao i uposlenici rudnika „Banovići“.

Nakon intoniranja himne, sjednicu je otvorio domaćin događaja, direktor Društva Rasim Dostović, koji je nakon uvodnih pozdrava prisutne upoznao sa dešavanjima i rezultatima koji su obilježili godinu na izmaku. U svom obraćanju iznio je i stanje u kojem je Rudnik zatečen pri preuzimanju dužnosti krajem mjeseca juna tekuće godine.

- Ono što je jako zabrinjavajuće je činjenica da smo na čelo nekadašnjeg giganta došli u trenutku kada nije bilo otkrivene nijedne tone uglja, gubitak za prvih šest mjeseci iznosio je 10,5 miliona KM, dugovanja prema dobavljačima oko 35 miliona KM, ali i enormno visoka

kreditna zaduženja u iznosu oko 57 miliona KM i trenutno je među 20 velikih gubitaša u FBiH. Nakon 16 godina uspješnog poslovanja ove kompanije, neko je za nepune tri godina namjenski napravio ovakve rezultete vođen pogrešnim politikama i nestručnim rukovodstvom - kazao je Dostović.

Međutim, navodi da su uz jasnu viziju, kvalitetan kadar i ispravne poteze, pozitivan ishod umjesto ovoga napisati: i stabilnije poslovanje izvjesni već u narednoj godini, dok je za potpunu stabilizaciju potreban duži vremenski period.



- Ovogodišnji gubitak značajno ćemo smanjivati u narednom periodu, što će rezultirati i stabilizacijom ove kompanije. Ulažemo ogromne napore, energiju i znanje da vratimo Rudnik na listu uspješnih kompanija, gdje je ranije i bila.. Uz podršku sposobne kadrovske strukture, Vladu FBiH i naše dobavljače vjerujem da ćemo uspjeti na tom putu. Do sada smo uspjeli za 50% povećati nivo raspoloživost mehanizacije, podigli nivo otkrivke u projektovane količine i istovremeno smanjili gubitak na mjesečnom nivou. Nastavit ćemo pregovore za veću cijenu uglja za termoelektrane, koja nije blagovremeno povećavana i nije pratila povećanja osnovnih troškova u procesu proizvodnje. Vratit ćemo Rudniku njegov kredibilitet i osigurati neovisnost elektroenergetskog sektora. Pred nama je teška poslovna godina i samo zajedno možemo nastaviti put ka stabilizaciji ovog preduzeća, u cilju povećanja produktivnosti rada i ostvarenja boljih rezultata poslovanja. Također, moramo intenzivno raditi i na poboljšanju uslova plasmana industrijskog uglja za druge potrošače, kao i na smanjenju cijena roba i usluga koje nabavljamo, prvenstveno nafte i repromaterijala – istakao je direktor Rasim Dostović.

Nakon sumiranja stanja i prezentovanja pravca oporavka Društva zahvalio se i svima koji na svojevrsan način daju podršku za ostvarenje zacrtanih ciljeva, a posebnu zahvalu uputio je onim najznačajnijim, banovićkim rudarima.

- Čast mi je biti na čelu kompanije koja je zasigurno kadrovski najjača na području cijele države, sa iskusnim i obučanim radnicima. Imamo potencijal koji ćemo i iskoristiti. Naši radnici su naša garancija za ostvarenje zacrtanih planova, za šta je dokaz i trenutno stanje na terenu. Uprava Društva uložiti će maksimalne napore da vrati povjerenje radnika, koje je prethodnih godina narušeno zbog političkih ciljeva, ali i na povećanju standarda naših rudara – navodi Dostović.

Na kraju govora upućujući čestitke povodom Dana rudara BiH, ali i nadolazećin božićnih i novogodišnjih praznika, zahvalio se svima koji razmišljaju i djeluju pozitivno u cilju očuvanja banovićkog giganta.

Prilikom da pozdravi svečani skup i svim rudarima čestita Dan rudara iskoristio je i predsjednik Nadzornog odbora RMU „Banovići“ d.d. Banovići Enver Omazić. Osvrnuo se na tešku proizvodnu i finansijsku godinu u Rudniku, te spomenuo da su Uprava i Nadzorni odbor došli na nesrazmjeran broj administrativnih radnika u odnosu na proizvodne, fiktivne i nerealne planove poslovanja, te nisku cijenu uglja.

- Ono što smo zatekli morali smo što prije sanirati. Odmah nakon imenovanja zajedno sa Upravom Društva i radnicima Rudnika napravili smo plan djelovanja. Revidovanjem Trogodišnjeg plana poslovanja vratili smo planirane veličine u realne okvire, ispregovarali

smo veću cijenu uglja prema termoelektranama, a radimo i na novom Pravilniku o radu gdje ćemo nastojati ispraviti grešku i usmjeriti se na poboljšanje stanja proizvodnih radnika – kazao je gospodin Omazić.



Ispred Vlade FBiH čestitke je uputio Ministar razvoja, poduzetništva i obrta Vojin Mijatović, te naveo da je izuzetna čast biti u Banovićima povodom ovakvog praznika i povodom rezultata koji su napravljeni ka oporavku Rudnika u relativno kratkom vremenskom periodu.

- Vlada FBiH u punom kapacitetu stoji iza rukovodstva RMU „Banovići“, potpuno smo svjesni da će proces revitalizacije i vraćanja proizvodnje u planirane količine trajati duži period, ali bez dileme kao većinski vlasnik dajemo podršku na sve do sada urađeno. Čast je biti gost u Banovićima, čast je biti među rudarima i tek kad sam došao ovdje shvatio sam o čemu su mi ranije govorili, da su Banovići Rudnik i da je Rudnik Banovići – istakao je ministar Mijatović.



Shodno svemu navedenom, svečanost je bila idealna prilika i za promociju laureata, kojima je dodijeljena zahvalnica i novčana nagrada za kontinuiran rad, te doprinos za unaprijeđenje i očuvanje kolektiva. Za doprinos u radu nagrađeno je 92 uposlenika, a plaketu Zaslužni član društva dobilo je 10 radnika Rudnika.

U sklopu obilježavanja Dana rudara BiH organizovan je i literarni natječaj na temu „banovički rudar“ za sve osnovne škole sa područja općine Banovići, a najboljima je dodijeljena i prigodna nagrada. Među pet najboljih literarnih radova su radovi učenika: Aiše Mujagić iz O.Š. „Banovići, Naide Bojić iz O.Š. „Grivice“, Eme Karahodžić iz O.Š. „Banovići selo“, Adne Kadrić iz O.Š. „Treštenica“ i Mirhe Mušanović O.Š. „Seona“.

Svečana proslava Dana rudara BiH tradicionalno je započela prijemom porodica poginulih radnika rudnika u odbrambeno oslobodilačkom ratu, zatim ispraćajem

penzionisanih radnika, a održani su i svečani zborovi radnika. Za kraj, u čast rudara, 21. decembra upriličen je i spektakularni vatromet.



LAUREATI 2023. GODINE

UKUPNO NAGRAĐENA 102 ZAPOSLENIKA RMU „BANOVIĆI“ d.d. BANOVIĆI



Na svečanoj sjednici Uprave i Nadzornog odbora RMU „Banovići“ d.d. Banovići održanoj 20. decembra 2023. godine povodom Dana rudara BiH, promovisano i nagrađeno je ukupno 102 zaposlenika Rudnika.

Najviše počasno zvanje Zaslužni član Društva dobilo je 10 radnika, i to: Raif (Muhamed) Glibanović, Mirnes (Osman) Softić, Suad (Mehmed) Softić, Miralem (Ibrahim) Salihbašić, Senad (Zejnil) Hasanović, Almir (Adem) Čolić-posthumno, Ismet (Osman) Bajramović, Ibrahim (Latif) Handalić, Mensur (Muhamed) Gutić i Husein (Emin) Beširević.

Zaslužni članovi Društva, pored priznanja, počašćeni su i novčanom nagradom u iznosu od 1.000 KM.

Odlukom Uprave Društva dodijeljene su i Plakete za doprinos u radu za 92 zaposlenika.

Iz pogona „Površinska eksploatacija uglja“ nagrađeni su: Almir (Adem) Saletović, Sead (Ibrahim) Kasumović, Damir (Zaim) Kukić, Hasan (Edhem) Mahovkić, Mustafa (Muharem) Mujić, Sead (Redžo) Šehić, Adis (Šefik) Varešević, Kenan (Mustafa) Čabrić, Jasmin (Adem) Čaušević, Zikrija (Ibrahim) Alibašić, Mersed (Hasib) Mujić, Nedžad (Zulfer) Lapandić, Rasim (Vejsil) Softić, Šahbaz (Memiš) Kovačević, Elizabeta (Abdulah) Rahmanović, Nijaz (Nezir) Hasić, Sulejman (Halil) Kasumović, Redžo (Asim) Demirović, Mensur (Šaban) Okačić, Nedžad (Halil) Kadrić, Hiljaz (Mehmed) Tabaković, Safer (Ramo) Mešanović, Sead (Mustafa) Šahbazović, Fikret (Džemal) Zejnilović, Hava (Muharem) Idrizović, Ramiz (Ibrahim) Avdić, Nevres (Suljo) Nurković, Admir (Izet) Delić, Anes (Senad) Dedić, Čamil (Suljo) Kovačević, Suad (Rahman) Rahmanović, Nezir (Pašan) Mujezinović, Mirzet (Kadrija) Karahodžić, Sakib (Ismet) Šehić i Fazila (Mustafa) Karahodžić.

Laureati iz pogona „Podzemna eksploatacija uglja“ su: Adil (Zim) Berbić, Đulaga (Halil) Sejdinović, Samir (Fadil) Kantić, Muamer (Džemil) Omerčić, Eldar (Rahman) Okačić, Amir (Šemso) Softić, Sakib (Ismet) Zejnilović, Elmir (Šemso) Bajrić, Mirzet (Ahmet) Nurković, Zehrudin (Nasan) Pirić, Amir (Asim) Husagić, Samir (Asim) Kurtić, Mehmed (Džafer) Avdić, Ramiza (Ramo) Islamović, Suad (Fadil) Šehić, Emir (Fikret) Idrizović i Sead (Čamil) Borovačkić.

Iz pogona „Separacija“ priznanja su dobili: Nezir (Omer) Karabašić, Refik (Jusuf) Smajlović, Šemso (Hasan) Efendić, Dževad (Hasan) Delić, Nermina (Ahmet) Kalajevac, Rasema (Šaban) Softić, Nedžad (Ramo) Brkić, Mirnes (Ešef) Smajlović, Zuhdija (Suljo) Kudumović, Hasan (Ibrahim) Mehić, Isajet (Ismet) Zejnilović, Suvad (Salih) Halilčević, Zijad (Meho) Rahmanović i Senad (Suljo) Čolić.

Priznanje za doprinos u radu dobili su i zaposlenici pogona „Željeznički transport“ i to: Džemal (Kasim) Berbić, Sabahudin (Omer) Saletović, Asmir (Nuriya) Zejnilović, Suvad (Ismet) Berbić, Nezira (Kasim) Uščuplić, Šefik (Ešef) Abdulahović i Mujo (Huso) Numanović.

Nagrađeni su i zaposlenici pogona „Standard i usluge“ i to: Mevludin (Ramo) Čergić, Emina (Ibro) Hujdurović i Zina (Čamil) Čehajić.

Plaketa za doprinos u radu uručena je i radnicima organizacione jedinice „Direkcija“ i to: Nezir (Mujo) Nurković, Fehim (Omer) Okačić, Suad (Emin) Bojić, Nuraga (Emin) Beširević, Nazif (Šaćir) Bećarević, Refika (Avdo) Husić, Franka (Jozo) Jokić, Mirsada (Huso) Husić, Emina (Ibrahim) Šarić, Armin (Mešan) Huskanović, Almir (Adem) Delić, Dževad (Salih) Đerzić, Eldina (Sead) Saburović, Senada (Ramiz) Mustajbašić, Sifeta (Muharem) Bebaković i Nehida (Muharem) Mehić.

Dobitnicima nagrada za doprinos u radu isplaćena je i novčana naknada u iznosu od 500 KM.



PROIZVODNJA UGLJA I OTKRIVKE

KRAJ GODINE OBILJEŽIO RAST PROIZVODNIH POKAZATELJA



Kao i svaki put do sada, decembar je mjesec u kome se svode svi proizvodni i finansijski rezultati poslovanja godine na izmaku, koja je za rudnik „Banovići“ okarakterisana kao najteža poslovna godina do sada.

Dokaz tome su i proizvodni rezultati, gdje je evidentno ostvarenje znatno ispod plana poslovanja preduzeća, posebno posmatrajući izvještaj za prvih šest mjeseci, kada je otkrivka iznosila oko 67,05%, dok je proizvodnja uglja bila na nivou od 83,60%, što za sobom povlači i velike finansijske gubitke.

U rudarstvu otkrivka je preduslov za buduću proizvodnju, a ovakvi rezultati sa tendencijom pada, za Rudnik su predstavljali dodatni problem i poteškoću za nastavak poslovanja.

Razlog ovakvog zabrinjavajućeg stanja Uprava Društva vidi u niskom stepenu raspoloživosti mehanizacije nastalom zbog dotrajalosti opreme, ali i neadekvatnog održavanja. Također problem je stvaralo i izraubovano stanje na ugljenokopima, što dokazuje veliko odstupanje od plana realizacije otkrivke, kao i podatak da u mjesecu junu nije ni bilo otkrivenog uglja.

Nezapaženo nije ostalo ni stanje u pogonu „Podzemna eksploatacija uglja“, gdje je za šest mjeseci proizvodnja uglja iznosila samo 174.642,14 tona, što bi u procentima predstavljalo 64,7% u odnosu na plan. Međutim, pozitivno je istaknuti pomak koji se desio u drugom dijelu godine, kada je došlo do određenog poboljšanja rezultata. Nivo realizacije otkrivke podignut je na 75,62%, dok proizvodnja uglja iznosi 88,56%. Iako su rezultati još uvijek ispod plana, u izuzetno lošem stanju u Rudniku, iz Uprave navode da oni predstavljaju postepeno zaustavljanje pada i

vraćanje ka stabilizaciji poslovanja. Vidljivo poboljšanje rezultata na otkrivci ulijeva veliku dozu sigurnosti za povećanje nivoa proizvodnje uglja u narednom periodu.

Zbog pomenutih rezultata rada i stvaranja velikog gubitka, te zapuštenog stanja na pogonima Rudnika, Uprava Društva morala je postaviti realne planove. U propisanom roku izvršeno je revidovanje Trogodišnjeg plana poslovanja Društva za 2023. – 2025. godinu i Godišnjeg plana za 2023. godinu.

Očigledno je da sumirani rezultati za tekuću godinu neće doseći planirane veličine i da će bilježiti određena odstupanja, obzirom da je od mjeseca januara do mjeseca novembra proizvodnja uglja iznosila 1.215.253,18 tona separisanog uglja, dok je realizacija otkrivke bila na nivou od 8.364.985 metara kubnih čvrste mase. Ali akcenat treba biti stavljen na to da je posljednjih mjeseci vidljiv porast ostvarenja rezultata po svim segmentima, te da se naredne godine može očekivati stabilniji proces proizvodnje uglja i otkrivke.



PODZEMNA EKSPLOATACIJA UGLJA

**PLAN PROIZVODNJE UGLJA REVIDOVAN
U REALNE KOLIČINE**

Nedavnim revidovanjem Trogodišnjeg plana poslovanja RMU „Banovići“ d.d. Banovići planirane količine proizvodnje uglja vraćene su u realne okvire. Naime, po novom Planu godišnja proizvodnja jamskog uglja iznosi oko 400.000 tona separisanog uglja, dok je svojevremeno taj iznos bio čak i 750.000 tona, a u posljednjem periodu 550.000 tona, što je za banovičku jamu oduvijek bilo teško ostvarivo.

Kako navode iz rukovodstva pogona „Podzemna eksploatacija uglja“ proizvodnju od 400.000 tona separisanog uglja realno je očekivati već naredne godine, obzirom na to da će se i eksploatacija uglja vršiti iz otkopnog polja Z₆, gdje su mnogo povoljniji uslovi otkopavanja.

Proizvodnja uglja na kumulativnom nivou za tekuću godinu, zaključno sa mjesecom novembrom iznosi 282.269 tona rovnog uglja i eksploatiše se iz otkopnog polja Z₂, što je za oko 65.000 tona više u odnosu na isti period prethodne godine. Nakon određenog zastoja, u okviru plana vraćena je i priprema jamskih prostorija, odnosno pripremljena je transportna prostorija otkopnog polja Z₆ u cijeloj dužini od 775 metara, vezno ventilacioni prekop 2 u dužini od 110 metara i trenutno se vrši pripremanje ventilacione prostorije Z₆ u drugom zahvatu, uspostavljeno je protočno provjetravanje kroz vezno ventilacioni prekop i dio transportne prostorije. Za naredni period preostalo je još 330 metara za pripremu ventilacione prostorije, te pripremu 110 metara širokočelne prostorije.

Narednih pet mjeseci eksploatacija jamskog uglja nastavit će se iz otkopnog polja Z₂ drugi zahvat, gdje su uslovi rada specifični, jer je taj dio u potpunosti bio potpoljen tokom gašenja požara u jami 2021. godine. Međutim, ukoliko radovi budu tekli dosadašnjom dinamikom, planirano je već tokom mjeseca juna otkopavanje privesti kraju i izvršiti prebacivanje opreme u otkopno polje Z₆, koje će biti spremno za eksploataciju.

Dinamiku otkopavanja i pripreme prostorija svakako će usloviti mogućnost održavanja opreme, obzirom da nekoliko godina unazad nije bilo većih investicionih ulaganja, što je u jednom periodu i rezultiralo kašnjenjem priprema prostorija i nisku proizvodnju uglja. Radnici na održavanju ulažu velike napore da održe opremu u funkcionalnom stanju, te na taj način doprinesu ispunjenju planova.

Važno je spomenuti da je u proteklom periodu olakšan prevoz radnika na radilišta, odnosno dobijena je dozvola za prevoz ljudi za trakasti transporter T3, a u toku je i dobijanje dozvole za trakasti transporter T4 i T5.

Iz pogona ističu da je u naredon periodu neophodno izvršiti nabavku određene opreme i riješiti problem velikog nedostatka radne snage u jami „Omazići“, da bi se mogla osigurati stabilnost jamske proizvodnje, nesmetano funkcionisanje pogona i ostvarenje zacrtanih ciljeva.

POVRŠINSKA EKSPLOATACIJA UGLJA

POJAČAN INTENZITET RADOVA NA ODRŽAVANJU MEHANIZACIJE



Izraubovani kopovi Rudnika, dotrajala mehanizacija, te nizak nivo ostvarenja proizvodnih rezultata bila je tema razgovora sa prvim čovjekom pogona „Površinska eksploatacija uglja“ Begom Birparićem.

Koji je nivo ostvarenja proizvodnje uglja i otkrivke na kumulativnom nivou i da li je došlo do porasta rezultata u odnosu na prvo polugodište?

Nivo ostvarenja proizvodnje uglja i otkrivke u Površinskoj eksploataciji uglja u prvih šest mjeseci u periodu januar-juni 2023. godine bio je 93% na uglju i 67% na otkrivci.

U periodu druge polovine godine tj. juli-decembar 2023. godine bio je nešto više od 102% na uglju i iznad 103% na otkrivci.

Međutim treba napomenuti da je kvalitet uglja u drugoj polovini godine bio značajno bolji, a samim tim finansijski efikasniji, jer se u prvoj polovini godine, zbog nedostatka otkrivenog uglja iz osnovnog sloja, eksploatisao uglavnom drugi pomoćni sloj znatno slabijeg kvaliteta.

Ovo navedeno poboljšanje u drugoj polovini godine rezultat je intenzivnijeg rada na podizanju ispravnosti rudarskih mašina i iskoristivosti istih. Taj trend i intenzitet se mora i dalje nastaviti i poboljšavati ako ne želimo doživjeti tešku sudbinu drugih rudnika.

Da li ima dovoljnih količina otkrivenog uglja i koji je razlog što u mjesecu junu nije bilo otkrivenog uglja?

Nema dovoljnih količina otkrivenog uglja i ta borba za otkrivanjem novih količina uglja za stabilniju i bolju proizvodnju trajat će još dugo. Veliki je dugogodišnji zastoj napravljen u radovima na otkrivci u odnosu na eksploataciju uglja i to je teško nadoknaditi za kratko vrijeme. Trebat će više godina intenzivnog rada, ali se stanje ipak popravlja. Najvažnije je da se prekinula tendencija daljnjeg padanja na proizvodnji uglja i radova na otkrivci.

Treba nastaviti ovim intenzitetom svih aktivnosti i radova i čak još pojačati intenzitet u tom pravcu ako se želi izaći na tkzv. "Zelenu granu". Za sada uspijevamo obezbijediti dovoljne mjesečne količine otkrivenog uglja i isporučivati ga Separaciji. Ne bi trebali dolaziti više u situaciju kakva je bila u prethodnom periodu, ali predstoji još puno truda i rada da se proizvodnja stabilizira.

Koji je razlog odstupanja ostvarenih proizvodnih rezultata od planiranih.

Kada su u pitanju proizvodni rezultati i razlika ostvarenih i planiranih količina, može se reći da je uzrok svih uzroka neadekvatna kadrovska politika. Neadekvatna kadrovska rješenja uzrokuje dalje neadekvatne poteze, loše planiranje, slabije upravljanje, lošija kontrola, gubi se red i disciplina, odgovornost slabi, gubi se poštovanje znanja i rada itd. To sa sobom povlači pad kapaciteta i ubrzano slabljenje sistema. Uzrok je uvijek u neadekvatnom kadroviranju na svim nivoima i oko toga treba strogo voditi računa da se biraju najbolji kadrovi na odgovorna i ključna mjesta, bez obzira na sve drugo. Ovaj kolektiv obiluje stručnim i sposobnim kadrovima, te vrijednim i iskusnim radnicima svih profila i u tome je najveća snaga ovog Rudnika. Treba taj potencijal pravilno rasporediti i iskoristiti. Mišljenja sam da pogrešan raspored kadrova može da ima dramatične posljedice, kako za pojedince tako i za cijeli Rudnik.

Da li se podigao nivo raspoloživosti mehanizacije? Koje se aktivnosti poduzimaju po tom pitanju i koliko uspješno?

Raspoloživost Rudarske mehanizacije je značajno popravljena i to se odmah osjeti i vidi u rezultatima na otkrivci i uglju. Bez ispravnih mašina nema ni rada. Početak svega se ogleda u pouzdanosti i raspoloživosti osnovne rudarske mehanizacije tj. bagerskih i kamionskih jedinica, a onda ostale pomoćne mehanizacije koja opslužuje i poboljšava uslove u površinskim kopovima.

Ono što je važnije od spomenutog dostignutog poboljšanja raspoloživosti rudarske mehanizacije je to što je u značajnoj mjeri poboljšan pristup toj problematici kroz: brže nabavke rezervnih dijelova, ažurnije praćenje potrebnih procedura i prioriteta, preventivno djelovanje, bolja upotrijebljenost sa stručnom radnom snagom, bolje i pravilnije stimulisanje. Sve su to aktivnosti koje daju bolju raspoloživost rudarske mehanizacije. Naravno nad ovom problematikom stalno treba bdjeti i brzo preduzimati odgovarajuće mjere, jer je sistem veoma dinamičan i promjenjiv.

Koje aktivnosti se trenutno provode na realizaciji projekta Transportnog sistema, kada se očekuje puštanje u rad i šta će to predstavljati za površinske kopove?

Transportni sistem treba da bude žila kucavica kada je u pitanju rad na otkrivci u PK „Turiji“. Sa ovim se pitanjem po mom mišljenju nepotrebno manipuliralo i usporavalo. Pored objektivnih razloga (korona, globalna svjetska situacija zbog ratova, zapaljenje i zastoji u jami „Omazići“), postoje tu i subjektivni razlozi i nesnalaženje kada je ova problematika u pitanju.

Transportni sistem za otkrivku je neophodan jer troškovi kamionskog transporta na veće udaljenosti naglo rastu i takav vid transporta je nerentabilan. Zato kod dubokih i srednje dubokih kopova, kao što su naši, zbog velike dužine transporta, neophodno je uraditi transportni sistemi za otkrivku. Rudnik Banovići trenutno ulaže velike napore da uspostavi ovaj vid transporta. Ovih dana vrše se probe i usklađivanja parametara na drobilicama i trakama i treba da počne nešto intenzivniji rad ovog sistema da bi se izvršila i uspostava trase za odlagališni transport u dužini od 450 m. U tom periodu od nekoliko mjeseci bi se istovremeno sa transportom i odlaganjem određenih količina jalovine, takođe vršilo i uhodavanje cijelog transportnog sistema, uključujući i obučavanje rukovaoca i održavaoca. Značajne mase otkrivke bi se na taj način transportovale, što bi svakako uštedjelo određeni broj kamiona i smanjilo troškove otkrivke. Konačna uspostava kompletnog sistema sa potpunim kapacitetom se planira do kraja 2024 godine kada treba da bude montiran odlagališni transporter sa pretovarnim kolicima u dužini 450 m. Za ovaj odlagališni transporter koji je ujedno i posljednja potrebna stavka u cijelom transportnom sistemu postoji većina potrebnih komponenata i njegova početna montaža se očekuje u prvoj polovini naredne godine.

Da li je bilo investiranja u proteklom periodu i koji je plan za naredni period?

U 2023 godini investirano je u nabavku 2 buldozera koja su u radu već nekoliko mjeseci, zatim su nabavljena tri terenska vozila, utovarač 5 m³ i dva dizel motora za dampere.

U toku su procedure za nabavku jednog gredera i jednog hidrauličnog bagera sa dubinskim kopanjem zapremine

kašike min. 3m³ na dizel pogon, pogodan za kopanje i utovar uglja u najnižim zavodnjenim etažama kopa.

Za sljedeću godinu su planirane investicione nabavke jednog hidrauličnog bagera takođe dizel pogon sa obrnutom kašikom iznad 8 m³, zatim nabavka dva damper kamiona, kupovina potrebnih segmenata na odlagališni transporter, jednog buldozera, nabavka jedne niskonoseće prikolice i druge mašine koje su potrebne za realizaciju zacrtanih godišnjih planova.

Kakve su prognoze za narednu godinu vezano za proizvodne pokazatelje i raspoloživost opreme?

U narednoj 2024. godini očekivati je stabilniju proizvodnju uglja sa boljim kvalitetom prosječne vrijednosti iznad 14.000 KJ/kg. Vrše se dobre pripreme u otkrivanju značajnog dijela ležišta u centralnom dijelu kopa „Grivice“. Ovo što je do sada urađeno na tom lokalitetu daje već dodatne rezultate. Takođe se vrše dobre pripreme na ležištima uglja u kopu „Turija“ i sve to treba da bude značajno intenzivirano postepenim uvođenjem u rad transportnog sistema i odlagača. Raspoloživost opreme se takođe poboljšava i sve do sada provedene aktivnosti i ono što se trenutno radi vezano za održavanje i podizanje raspoloživosti prije svega bagera i kamiona i pomoćne mehanizacije, treba da daje sve više i više pozitivnijih efekata u 2024 godini.

Treba posebno naglasiti da Površinska eksploatacija uglja ima dobru stručnu i vrijednu radnu snagu koja je disciplinovana, svjesna u kojoj se trenutno situaciji nalazi Rudnik i da je samo naš rad i angažovanost može prevazići. To je naravno za svaku pohvalu i mislim da takođe rukovodstvo Rudnika to posebno cijeni i oslanja se na tu činjenicu iskusnih i vrijednih kadrova i dobrih i vrijednih radnika u Rudniku „Površinska eksploatacija uglja“.

Veliki učinak na poslovanje kompanije imala je i pravovremena reakcija u nastaloj situaciji po pitanju obezbjeđenja energenata, rezervnih dijelova i repromaterijala za nesmetano eksploataciju i preradu uglja.

Godina je završena sa ukupnim prihodima u iznosu od 165.563.383,69 KM, što je za 31.119.293 KM više u odnosu na prethodnu godinu, i ukupnim rashodima od 173.362.902 KM, iz čega je proizašao negativan finansijski rezultat, pri čemu treba napomenuti da u iznosu gubitka se nalaze 2,5 miliona KM troškova jame nakon požara, te vanredna isplata pomoći radnicima 2 miliona KM, što je svakako samo knjigovodstveni pregled poslovanja. Prava slika je ono što je postignuto u toku godine, načini djelovanja i rješavanja nastale situacije za koju je scenario mogao biti katastrofalan.

Kada uzmemo u obzir krizu u 2022. godini, te činjenicu da su sve pogrešne odluke iz prethodnih desetljeća došle na naplatu, te sve one koji unutar i van kompanije opstruiraju rad ili destruktivno djeluju, očuvanje stabilnosti Rudnika ogroman je uspjeh.

SEPARACIJA

DOTRAJALA OPREMA PREDSTAVLJA DUGOGODIŠNJI PROBLEM PROCESU SEPARISANJA UGLJA

Tokom čitave godine na pogonu za separisanje uglja rudnika „Banovići“ rezultati na proizvodnji uglja bili su mnogo niži u odnosu na planirane količine. Proizvodnja se kretala oko 79,78%.

Tehnički rukovodilac pogona navodi da je glavni razlog pomenutog rezultata svakako u kvaliteti i količini rovnog uglja, kao najutjecajnijeg faktora kvalitete separisanog uglja. Stanje u kojem se nalaze pogoni „Površinska eksploatacija uglja“ i „Podzemna eksploatacija uglja“ doprinijelo je pogoršanju kvalitete i količine rovnog uglja, a ujedno i niske rezultate na separisanju. Međutim, tokom godine, odnosno tokom januara, februara i novembra kvalitet rovnog uglja je bio zadovoljavajući, ali nedovoljno da nadomjesti razliku u odnosu na planirane količine proizvodnje uglja.

Uvođenjem mobilnih drobilica dodatno je ugrožen proces separisanja iz razloga što je rovní ugalj boljeg kvaliteta dolazio na drobilice, a rovní ugalj lošijeg kvaliteta dolazio na separaciju, gdje je na dotrajaloj opremi uzrokovao dodatne

probleme, otkazivanje pojedinih postrojenja i velike zastoje. Problem je riješen ukidanjem mobilnih drobilica i pogon Separacije se postepeno dovodi u projektovano stanje i kvalitet uglja je u skladu sa deklaracijama.

Pored toga, na rezultat separisanog uglja veliki uticaj imalo je i dugogodišnje nedovoljno ulaganje u tehnološki proces na pogonu, gdje se trenutno radi sa dotrajalom opremom. U prethodnom periodu izvršena je samo nabavka grajfera Liebherr, koji je u velikoj mjeri doprinio radovima na depovima uglja. Završen je i postupak nabavke primarne drobilice, za koju se očekuje isporuka, te je planirano da se ista ugradi u pogon do kraja mjeseca februara naredne godine, što će umnogome olakšati rad tehnološkog procesa u smislu nesmetanog stvaranja rovnog uglja na projektovane granulacije.

Zastarjela oprema uzrokovala je i mnogo zastoja i remonta, koji su obuhvatali učestale zamjene platna na trakama, remonte elevatora sa zamjenom pripadajuće opreme, te mnogih drugih radova s ciljem što boljeg separisanja rovnog uglja.

Problemi se dalje ogledaju i u nedostatku proizvodne radne snage. Ovakav tip problema do sada je prevazilažen nadljudskim zalaganjem radnika, koji se dodatno žrtvuju da bi u izuzetno teškim uslovima osigurali nesmetan proces separisanja.

U konačnici, da bi se održao i unaprijedio tehnološki proces na pogonu „Separacija“ ulaganje u opremu je od ključnog značaja, kao i rješavanje problema sa nedostatkom proizvodne radne snage, a uspostavljanjem projektovanog sistema separisanja i oplemenivanja uglja Rudnik svakim danom sve više vraća izgubljeno povjerenje kupaca.

POTPISAN KOLEKTIVNI UGOVOR U OBLASTI RUDARSTVA

AKCENAT STAVLJEN NA POVEĆANJE MATERIJALNIH PRAVA RADNIKA

21. decembra, na Dan rudara BiH postpisan je novi Kolektivni ugovor o pravima i obavezama poslodavaca i radnika u oblasti rudarstva u FBiH. Ugovor je potpisao Ministar energije, rudarstva i industrije Vedran Lakić i predsjednici Samostalnog sindikata radnika rudnika FBiH Sinan Husić i Samostalnog sindikata rudara u FBiH Zijad Lačić.

Potpisivanje novog Granskog kolektivnog ugovora došlo je do značajnog povećanja materijalnih prava za sve radnike

Rudnika, odnosno dogovorono je povećanje linearnog dodatka sa 230 KM na 350 KM, kao i povećanje toplog obroka sa 14 KM na 17 KM.

Kroz Samostalni sindikat rudara u FBiH u pregovorima su učestvovali i predstavnici Sindikalne organizacije RMU „Banovići“ d.d. Banovići, koji su zajedno sa pomenutim učesnicima uspjeli da ispregovaraju povećanje novčanih primanja radnika, te iznađu način da se na adekvatan način osiguraju prvenstveno proizvodni radnici

- Uspjeli smo dogovoriti jedan kvalitetan model, koji omogućava isto povećanje materijalnih prava za sve radnike i zadovoljni smo ishodom. Ali, zadovoljni smo i na tome što smo, po prvi put do sada, tokom pregovora imali podršku Uprave Društva, bez obzira na jako tešku situaciju u RMU „Banovići“. Uprava Društva je svjesna da nema realizacije zacrtanih planova bez zadovoljnih i adekvatno plaćenih radnika – kazao je Mehmed Hasanović, predsjednik Skupštine Sindikalne organizacije RMU „Banovići“ d.d. Banovići.

Kolektivni ugovor o pravima i obavezama poslodavaca i radnika u oblasti rudarstva u FBiH stupa na snagu 01. januara 2024. godine i važi do 31. decembra 2024. godine.

POVODOM 21. DECEMBRA, DANA RUDARA BIH

SVEČANIO ISPRAĆENO 112 BIVŠIH ZAPOSLENIKA RUDNIKA „BANOVIĆI“

U okviru programa obilježavanja 21. decembra, Dana rudara BiH RMU „Banovići“ d.d. Banovići organizovao je svečani ispraćaj za 112 penzionisanih radnika, koji su pravo na penziju stekli tokom 2023. godine. Kolektiv Rudnika napustilo je 100 muškaraca i 12 žena.

Ovogodišnji ispraćaj okupio je penzionere sa svih pogona Rudnika, a obilježilo ga je lijepo druženje uz muziku i ručak, ali i lijepe čestitke i želje za narednu etapu života. Dobrodošlicu bivšim uposlenicima poželio je direktor Društva Rasim Dostović, istaknuvši da je ovo svojevrsna tradicija kojom se odaje priznanje za sve godine provedene u kolektivu, kao i sve iskustvo i znanje koje su predočili mlađim generacijama.

- Zahvalio bih se svima na odanom radu i doprinosu koji ste dali za ovo preduzeće. Istovremeno smo radosni i tužni zbog vas. Radosni jer ste u zdravlju izradili svoj radni vijek i dočekali penziju, a tužni jer nam iz kolektiva odlaze vrsni majstori i dobri radnici. Nadam se da će vam naredni period života biti ispunjen mirom i blagostanjem, a isto tako vjerujem da će u periodu koji slijedi kolektivu nedostajati vaša energija, znanje i optimizam – kazao je Direktor RMU „Banovići“ d.d. Banovići, Rasim Dostović.

Penzionisani rudari kažu da će radni vijek pamtiti po lijepom međusobnom druženju i solidarnosti, ali da je bilo i teških trenutaka koje su prevazišli isključivo zajedničkim radom i ustrajnošću.

Amir Duraković cijeli svoj radni vijek proveo je u jami „Omazići“ rudnika „Banovići“ na poslovima mehanizovanog otkopavanja uglja.

- Svoj radni vijek započeo sam odmah nakon rata 1996. godine i evo sada mogu reći da sam ga u cjelosti proveo u jami na mehanizovanom otkopavanju, što mi je izuzetna čast. Ovo je poseban trenutak i od svega srca želim da ga dožive svi moji komorati – kazao je Duraković.

Radni vijek u kolektivu rudnika „Banovići“ prije 40 godina započela je Šuhra Ljaljić i to u organizacionoj jedinici „Standard i usluge“ iz koje je ove godine zvanično i ispraćena.

- Rudnik je preduzeće koje me hranilo svih ovih godina do penzije, ali mogu reći da smo i mi hranili i sve ove ljude koje danas ispraćamo, obzirom da sam cijeli svoj radni vijek provela na obezbijedenju ishrane za radnike – kroz smijeh je govorila Šuhra Ljaljić.

Od davne 1985. godine dio kolektiva bio je i Zijad Softić. Na pogonu „Površinska eksploatacija uglja“ obavljao je različite poslove.

- Na Bešinu sam započeo svoj radni vijek, ali kroz godine rada mogu reći da sam obišao skoro cijeli pogon, odnosno površinske kopove „Turiju“, „Grivice“, rekultivaciju i Vozni park. Radio sam i kao mehaničar, traktorista, a u penziju sam ispraćen iz organizacione jedinice Vozni park, gdje sam radio proteklih pet – šest godina. Sve u svemu jako sam zadovoljan, bilo je dobrih i loših dešavanja, ali kako u životu tako i u poslu, iskustvo i uspomene stičemo u svim uslovima – kazao je Softić.

Zahvalnost dojučerašnjim kolegama za nesebičan doprinos koji su dali u toku svog radnog vijeka iskazao je i član Komisije za organizaciju ispraćaja penzionera Fahrudin Pozderović, navodeći da je od njih u velikoj mjeri zavisio razvoj kolektiva i to da danas preduzeće i dalje radi, stvara i proizvodi.

Bivši uposlenici Rudnika ispraćeni su uz prigodne poklone, štap i ručni sat sa posvetom za sjećanje na dugogodišnji rad, predanost i međusobne odnose sa kolegama. Zahvalnost je zaista višestruka i složena. Penzionerima želimo da uživaju u svakom novom danu koji je pred njima, okruženi ljudima koji ih vole i poštuju.



POVODOM 21. DECEMBRA, DANA RUDARA BiH

UPRILIČEN PRIJEM ZA 77 PORODICA RADNIKA RUDNIKA POGINULIH U ODBRAMBENO OSLOBODILAČKOM RATU 1992. – 1995. GODINE

Kako već tradicija nalaže i ove godine obilježavanje Dana rudara BiH započelo je prijemom 77 porodica radnika rudnika „Banovići“ poginulih u odbrambeno oslobodilačkom ratu 1992. – 1995. godine.

Na samom početku prijema porodice šehida zajedno sa predstavnicima RMU „Banovići“ d.d. Banovići položili su cvijeće na Centralno spomen obilježje poginulim borcima, te učenjem Fatihe prisjetili se njihove hrabrosti, humanosti i doprinosa za očuvanje Bosne i Hercegovine.

Nakon polaganja cvijeća, okupljeni su nastavili druženje u restoranu Radničkog doma, gdje im je dobrodošlicu i zahvalnost na odazivu uputio direktor Društva Rasim Dostović, te istako spremnost menadžmenta Rudnika za svaki vid pomoći u rješavanju različitih problema na koje nailaze djeca šehida.



- Ono najmanje što možemo uraditi za šehide je da ih se prisjećamo, posebno u prazničnim trenucima, kada najviše i nedostaje njihovo prisustvo. To je naša obaveza i naša odgovornost. RMU „Banovići“ radi na očuvanju tradicije obilježavanja i sjećanja na naše stradale, kako bi buduće generacije znale šta se dogodilo i kako bi se njegovala kultura sjećanja. Djeca šehida i poginulih boraca zauvijek će biti briga Rudnika, te ćemo poduzeti sve napore da se riješi njihov materijalni status – kazao je Dostović.

Na ovakvu gestu nisu ostali imuni ni članovi porodica poginulih, istaknuvši da cijene nastojanje da se ne zaborave oni koji su dali svoje živote za očuvanje domovine.



Milena Barišić supruga je poginulog borca, koja skoro tri decenije živi u sjećanju na njega i njegovo djelo.



- Mój suprug radio je u rudniku „Banovići“ 13 godina, sve do kobnog rata, kada je nažalost i položio svoj život za odbranu domovine. Najmanje što zaslužuje je sjećanje. Drago mi je da menadžment Rudnika drži do ovakve tradiciji, te da svake godine zajedno odamo počast svim stradalim i to povodom Dana rudara – kazala je Milena Barišić.

Supruga poginulog borca je i Emina Demirović, koja je nakon njegove smrti ostala samohrana majka sa dvoje djece.



- Prije tačno 29 godina izgubila sam supruga, ostala sam sama sa dvoje djece. Od tada, svake godine povodom istog praznika Rudnik upriliči jedno ovakvo okupljanje, na čemu sam im jako zahvalna. Zahvalna sam što ne dopuštaju da se zaboravi herojstvo naših boraca, ali i na tome što nađu načina da pomognu porodice, najčešće zapošljavanjem u ovaj kolektiv. Zato moram da napomenem da sam ja uposlenica Rudnika, kao i moj sin – navela je Emina.

Povodom Dana rudara BiH, na žiro račun 77 porodica uplaćena je i skromna novčana hedija u iznosu od 50 KM.



RUDAR informativna novina radnika
RMU "Banovići" d.d. Banovići

www.rmub.ba

Uređuje
Redakcioni odbor

DTP i štampa: "OFF SET" Tuzla

Riješenjem Republičkog komiteta
za informacije broj 04-651-537/77
od 6.9.1977.

List je uveden u Registar štampe R BiH.

E-mail: kontakt@rmub.ba
nadzorni.odbor@rmub.ba